

Marionna Schmid-Cavegn, Camischolas 21.07.1915- 01.01.1998

Placi Cavegn Muttenz/Rueras



La damaun da Daniev, gl'emprem di digl onn, ha il zenn grond clamau giud la tuor dalla baselgia s. Vigeli a Sedrun ch'igl aunghel dalla mort hagi gia entschiet cun la raccolta per gl'onn 1998 en nossa val. Spert ha ei giu num en vitgs ed uclauns che la Marionna, l'antieriura spin-drera, hagi bandunau nus per adina.

La Marionna ei naschida ils 21 da fenadur 1915 sco secund affon dils con-jugals Maria Barla e Lucas Cavegn-Gieriet a Rueras. Cun endisch onnns era ella gia circumdada dad otg fargliuns, mo ina sora, denton siat frars. Las scolas ha la Marionna frequentau a Rueras. Ils otg bials onns da scolaziun vegnan compleai 1931/32 cun in onn d'instrucziun en la scola da tener casa tier las soras domenicanas a Glion. Ei suondan lu in per onns d'agid tier ils da casa en casa ni sil fums. Gl'onn 1937 serenda Marionna

el spital cantunal da femnas Fontana a Cuera e frequenta l'instrucziun profes-siunala sco spindrera. Cun il diplom en sac surpren ella el decuors digl onn 1939 il buca lev uffeci da spindrera en la Val Tujetsch e quei sco successura de Nescha Valier da Camischolas.

Cons viadis che la Marionna ha fatg sco spindrera da Rueras a Selva/Tscha-mut, da Surrein/Cavorgia ni a Bugnei, quei sa negin. E quei da di e notg, da stad ed unviern. La stad steva in velo en disposizion che haveva buca bia dapli che duas rodas. Gl'unviern fuva ei sa-vens da fullar via tras nevadas, cuflas e cuflaus. In affon ha ella schizun spin-drau en las baraccas dils luvrers sin l'alp Tgom. Gl'onn 1979 surdat la Marionna quella lavur a successura Francisca.

Gl'atun 1954 sospusa Marionna cun Pauli Schmid e secasescha a Camischolas. Ella che ha, sco spindrera, giu da far ton cun affons ha deplorablamein buca giu la grazia da haver agens affons. Il zercladur 1977 miera siu mariu Pauli nunspitgadamein. Sil suenterereis ei plaun a plaun vegniu pli ruasseivel cun la Marionna. Ed il november 1992 fa ella il davos viadi della veta e pren dimora en la casa s. Vigeli a Sedrun. La damaun da Daniev 1998 pren l'antieriura spin-drera comiau da quest mund.

Nus tuts sperein in di sin in bien seveser.